



# Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 6 Yangia anidakangma : Tir Yimym tiryimym@aolima tir yimym TAPAK 8

Dr. Tapan Saikia nem Assam nung civilian award tematiba agütsü

Lionel Messi-i goal agütsüba 800 jungogo



VOL. XX NO. 162 (ADOK 162) DIMAPUR KÜPTOKNÜ (SATURDAY) METSÜREMI (MARCH) 25, 2023 ₹ 5.00

## Okadaki Rahul Gandhi aitsü; MP nungi anentsü

**New Delhi, March 24, 2023 (Agencies):** Gujarat kübok Surat okadak kati 2019 ken o ka nung Congress lennir Rahul Gandhi aitsüba sülen pa Member of Parliament (MP) nungi züngdokogo.

Lok Sabha Secretariat-i Rahul Gandhi anentsüba sangdong ka nung "March 23, 2023 nungi pa MP nungi anentsür" ta metetdaksüogo.

"Court of Chief Judicial Magistrate, Surat-i aitsüba sülen Kerala nungi Wayanad Parliamentary Constituency Member of Lok Sabha Rahul Gandhi, pa aitsüba anogo 23 March, 2023 nungi anentsür" ta sangdong nung shia lir.

Bharatiya Janata Party (BJP) lennir Purnesh Modi-i 2019 küm defamation case benokba angadandang Surat okadaki Rahul Gandhi aitsü aser pa küm ana tepuokdak ayutsü temerenshi agütsü.

2019 küm Karnataka nung election nüboyimba sentong ka

nung Rahul-i Modi nung aitsü ta Purnesh Modi-i ken o benok.

Rahul-i Lalit Modi, Nirav Modi aser PM Narendra Modi nung kasa dang aser auer dang ta jembi, ta Purnesh-i ashi.

Lok Sabha MP nungi anentsüba sülen ghonda ishika lir Rahul Gandhi-i "ni India ola atema rarar. Ni kechi ajurudir inyaksü mulunga lir" ta ashi.

Iba tatalokba atema opposition lennir aika ola adoker aser iba ya democracy indangindanga tepsetba lir ta parnokki aitsür.

Külen, Rahul Gandhi anentsüba anema Congress-i linük ajungalen "save democracy" movement inyaksü sentong ka renemogo.

Hokolbar nikongdang Congress president Mallikarjun Kharge, taoba Congress president Sonia Gandhi aser taoba Union Minister P Chidambaram nung dena Congress lennirtem senden ka amendang iba lemtet agiogo.

## Nagaland nung Nagaland nung TB Day among

**Kohima, March 24, 2023 (TYO):** Nagaland nunga "Yes, We Can End TB" omen nung ajemdaker World Tuberculosis Day mongogo.

Iba sentong ya Directorate of Health & Family Welfare Kohima nung agi aser Commissioner & Secretary, Y. Kikheto Sema-i o jembi.

TB ajanga temang, lokti aser rongsenketzüng nung timtem agütsüba osang prokshitsü atema kümshia March 24 nü World TB Day amonger. Iba anogomung nung nisung ajaki TB anema longjemer raratsü bendanga agütsüshitsü ayongzüker, ta pai ashi.

"Centre sorkar teyari ajanga Nagaland nung TB noktangtsü aser samatsütsüba indang mapa tulu inyaka arudar. Nagaland nung TB agi shiranger nisung 4000 shi lir anungji iba tashidak agientsü atema mapa talila inyaksü nüngdaker" ta Kikheto Sema-isa ashi.

Sustainable Development Goal ajanga alima nung 2030 tashi nung TB samatsütsü alizüng lir saka Prime Minister-i ayongzüka ama India nungbo 2025 tashi nung TB samatsütsü

nükjiding lir ta paisa ashi.

Centre sorkari "community support for TB patients" maparen tenzükogo aser iba dang "Nikshay Mitra Campaign" aser "Pradhan Mantri TB Mukta Abhiyaan (PMTBMA)" ta ajar ta paisa ashi.

TB agi shiranger nisung teimbaka sensakertem lir anungji asenoki parnok yaritsüla, ta Kikheto-isa ashi.

Iba atema Kikheto Sema-i district shia nung shiranger kaka (nisung 11) ita 6 atema Food Basket agüja yaritsü nangzüker.

Paisa Directorate of Health and Family Welfare nung ketdangtsür aser staff den temeimertem TB agi shiranger nisung kaka nem Food Basket agüja yaritsü ayongzüker. Iba nung Rs. 3000 endoktsü ta paisa shisem.

Administration, municipality, Social Welfare, Rural Development, Labour, Tribal Affairs, IPR amala line departments aser arogotem, NGOs, nija doctor tem, kibongtem aser kijatemi nungitba ajanga TB samatsütsü inyakba mapa takok angutsü ta Kikheto Sema-isa ashi.

## MIP, NSCN/GPRN-i jangjashitsür

**Dimapur, March 24, 2023 (TYO):** CFSB chairman-i Chief minister Neiphiu Rio dang NSCN/GPRN ya recognised group masü ta ashiba atema NSCN/GPRN-i jangjashitsüogo.

"Col. (Retd.) Isak Sumi ya NSCN/GPRN indang recognised representative lir aser pai India sorkar den osang agiteper. Pa ya NSCN/GPRN indang teshimtet nübo aser W/C, NNPGs indang

co-convener lir" ta MIP, NSCN/GPRN sangdong ka nung ashi.

NNPGs tentetba aser India sorkar den 'Agreed Position' sign asüba sülen W/C, NNPGs loksa aotsü aser Naga yimten maparen raksatsütsü atema tasa aika atonga inyaker. Ajsüaka NSCN/GPRN-i item olulu nem manisadaksütsü, ta MIP-isa metetdaksü.

(Maneni tapak 8 nung...)

## Ita 2 tsüngda bodyguards meyipa meshitsüla: Deputy CM Patton



**Kohima, March 24, 2023 (TYO):** Nagaland nung ita ana tsüngda police 3000 tashi bodyguards ama lezmüka aliba meyipa agitsü aser police kar danga duty nung yi ajemba putetra ozüng tesashi agi merenshitsu ta Nagaland Deputy Chief Minister, Y Patton-i ashi.

Tanü Nagaland Police Senior Officers aser Unit Commanders den senden ka amendang pai iba osang metetdaksü. Iba sentong nung DGP Rupin Sharma aser Additional DGPs Sandeep Tamgadge o R P Kikon nung aden.

NPF MLA Kuzholuzo Nienu-i assembly nung Nagaland Police pur static duty inyadaksüba aser Principal Secretary, Commissioner Secretary aser political party lennirtemi bodyguards anir senzüba atema asüngdangba sülen Y Patton-i iba osang metetdaksü.

Nagaland Police 3000 jungnüa bodyguards mesüra non-Police duties atema lezmükja lir, ta pai ashi.

Iba mapa ya Home

Commissioner lenisüba kübok security examination committee ajanga inyaksü ta Patton-i ashi.

Police aika yi ajemba mesüra mozü achiba osangtem lir aser parnokki department tenüng menüktür. Iba inyakyim jungjunga repringtsüla aser nüngdakra merenshitsu, ta paisa ashi.

"Taküm January nungi March tashi state general election mapang tatalokba kar dak alaka tensa tiptema dang süiogo. Police department-i mapa tajung inyakba atema tenüngsang agütsür" ta Y Patton-isa ashi.

Nagaland sorkar tasen akümba sülen tanga sentongtem dak alia Urban Local Bodies election, G-20 Summit aser Naga yimten tebilemetsü maparen ajurutsü anungji police renema alitsüla, ta paisa ashi.

Nagaland nung IRB jawans tali amshir aser parnok kanga anibelemdaksür anungji IRB personnel mapa ajemtsütsü atema Police department-i inyakyim ka tenzüktsüla, ta Patton-isa metetdaksü.

## Nagaland Police-i state terenlok leni anitsü: DGP Sharma

**Kohima, March 24, 2023 (TYO):** Nagaland police-i state nung tensa-mapang tajungba kümdaksütsü asoshi akokba tashi mapa inyaksü aser iba ajanga terenlok putu tasen ka tenzüktsü atema lenmang lapoktsütsü ta Director General of Police (DGP) Rupin Sharma-i ashi.

Hokolbarnü Police Headquarters Conference Hall nung Nagaland Police Senior Officers aser Unit Commanders-i Deputy Chief Minister in-charge of Home & Border Affairs, Y Patton den senden amendang Rupin Sharma-i iba ya ashi.

PHQ nung teinyaksü aika lir aser maparen tajungba akümtsü atema luden aika shimogo, ta paisa ashi.

Department-i Nagaland nung police mapa tajungba kümdaksütsü aser taküm January ita mapa tongtipangbaji 'War on Drugs' inyaker, ta DGP Rupin-isa ashi.

"Iba khuret anema raratsü atema department-i police nem tesayuba agütsütsü lemtet. Ano

mozü achirtem rehabilitation kanga tongtipang lir anungji yi ajemba mesüra mozü achiba police-i pei sasa tejakleni arur rehabilitation asütsüla. Yamaji mesüra department-i putet nungbo mapa nungi anentsütsü" ta pai metetdaksü.

Linük nung police ajak nem anti-Narcotics Pledge südaksüba Nagaland Police mezüngbuba asütsü akok aser iba tezüngzüktepi tanü agiogo.

"Nagaland police-i G-20 Summit, ULB elections, ENPO maparen, Peace Accord, AFSPA agientsüba aser ozüng alema mozü den tashiyim agi sen saruba aser ozüng alema mapa inyakba ajak azüoktsü atema renema alitsüla" ta DGP Rupin-isa metetdaksü.

"Asen loktiliba nung yimtsüng aser kin jenjang nung units kanga tongtipang. Anungji onoki CSOS aser NGOs kar den tesentaktep yur police mapa tajungba inyaksü merangtsü" ta paisa ashi.

"District aser police station aika nung police indang mapa balaka mali iba jagi department-i

Mon district kübok Oting nung lendong atalokba sülen MHA-i luden ka tenteta AFSPA meyipa repringshidaksü aser iba sülen Police Stations 15 nungi AFSPA agienogo anungji item tesem nung law & order aser telungpur khuret Nagaland state police-i dang repringtsüla ta paisa ashi.

Telungpur khuret ajema akümba ama Police Station aika nungi AFSPA aser Disturbed Areas agientsü anungji Nagaland Police-i tebilemetsü tuluba abentsü, ta paisa shisem.

1980s nung Nagaland Police nübo 1000 aliba 2023 nungbo police 26,000 shi kümogo. Department tali akangshitsü nüngdaker aser iba ya re-organization aser restructuring ajanga akoktsü, ta Deputy Chief Minister-isa ashi.

"Forensic Science Laboratory lapoktsü aser Cybercrimes, Cyber frauds, economic offences o cyber security azüoktsü atema senotsü teyari meshitsü atema DGP aser PHQ ajanga osang agütsütsü metetdaksür" ta paisa ashi.

Nagaland police indang uniform melentsüba onük atema "Prime Minister Narendra Modi ajanga 'One Nation, One Uniform' tebilemba lemsatepogo anungji department-i iba osang ata alitsü mepishir" ta Patton-isa ashi.

public nem ozüngren aser police indang training agütsütsü. Iba ya school nungi yimtsüngtem nung inyaksü" ta paisa ashi.

"Nagaland nung sobaliba inyakyim aser tanü putu indang police maparen sendakteptsü nüngdaker. Ozüng alema inyaksangshiba ya yimtsüngtem telongtet kübok adener anungji nübertem taküm lendong nungi kümzüka ayutsü atema village councils aser parnok inyaksangshi ya jungjunga tezüluba nung ayutsüla" ta DGP Rupin Sharma-isa ashi.

Public-i police dak temlung alemtsü atema ken o tem angati aser timtem melii benokdaksütsüla, paisa ashi.

Nagaland nung opposition maliba sorkar ka lir anungji item onük ya sorkar den benoktsü jembitsü mepishir, ta DGP Rupin-i Deputy Chief Minister dang ashi.

"Supreme Court aser Gauhati High Court-i bushisüngdangba aser law & order bendangtsü ashir aser iba atema department-i inyakyim ka tenzüktsü sentong yangludar" ta paisa ashi.

## Mokokchung nung World TB Day amung



Mokokchung CMO conference hall nung 'World TB Day' ayongzüka amungba mapang sentong shilem agirtem tangokba noksa nung angur. Mokokchung, 24th March, 2023.

**Mokokchung, March 24, 2023 (TYO):** Alima ajunga den külemi Mokokchung nunga "World TB Day" sentong "Yes! We can end TB" omen dak rangloker yangi CMO, conference hall nung takok ngua kaogo. Iba sentong ya National TB Elimination Programme (NTEP) kübok District Tuberculosis Centre Mokokchung-i achayanga ayongzüka.

Sentong nung District Health Society, Mokokchung nungi meyonger, Mokokchung

SDO Civil - Longdiba Sangtam, Mokokchung CMO - Dr. Limatula Aier, Mokokchung DTO - Dr. Toshila Jamir, DRTB SMO - Dr. P. Medemmayang parnoki shilem balala agi. Iba den TB tashitak nungi taneptsü angur TB Champion, Lanurenla aser Aosungkum nati taküm kuli lemsatep.

Tang Mokokchung district nung TB agi shiranga anepalur ajak agi 216 lir. Item rongnung MDR-TB agi shirangerji parnok 8 lir, TB patient yaritsü mulunger Ni-kshay Mitra-temji

parnok 27 lir aser tang tashi nung Ni-kshay Mitra-i yarirtemji 101 lir, ta Mokokchung DTO, Dr. Toshila Jamiri metetdaksü.

India nung 2025 tashi nungbo TB tashitak ya meshimeshia samadaksütsü nükla lir, anungji, iba nükla ataloktsü asoshi lokti balala den nüburtemi ya arok khuret ta angateta shilem agidaksünür, ta Dr. Toshilaisa tayongzüka ka agütsü.

Iba sentong nung department balala den arogo aser mulungtet telok balala nungi meyongertem arua aden.

## State nung ano anogo ishika tzüngsang majungtsü akok

**Dimapur, Metsüremi/March 24 (TYO):** Nagaland State Disaster Management Authority (NSDMA) ajanga aruya aliba anogo ishika atema tzüngsang-mopung osang lemsatepa liasü. NSDMA-i ashiba agi, aruya aliba anogo ishika Nagaland nung tzünglu sashia arutsü. State tesem ajungalen March 26 aser 27, 2023 anogotem mepet agi sübangtsü aser

tzünglu terara arutsü akok.

Ajisüaka Peren, Dimapur, Kohima, Wokha, Mokokchung, Mon aser Longleng district tem nung tesem kar nung kasa mapang tsüngi aser mopung tesashi dener tzünglu sashia arutsü akok, ta ashi.

Iba mapang state nung minimum aser maximum temperature ya 9°C aser 30°C tsüngta alitsü.

Iba mapang lendong timtem nungi jenbua alitsü mechi nüburtem saksalema aser kumdanga alitsü ajungshir, ta NSDMA, Home Department sangdong ajanga ashi.

NSDMA ajangasa DDMA aser aser sendaktepa aliba department ajanga dang meyi mapang nisung takum aser ki o jen bumzüksü asoshi renema alitsü metetdaksü.

## Mokokchung District Planning & Development Board senden menogo

**Dimapur, Metsüremi/March 24 (TYO):** Ita shia amenba Mokokchung District Planning and Development Board (DPDB) senden March ita atema March 24, 2023 nü Deputy Commissioner, Mokokchung indang Conference Hall nung mena liasü.

Deputy Commissioner & Vice Chairman DPDB, Mokokchung, Shashank Pratap Singh, IAS ajanga senden nung züngsemtem pela agizükba mapang district nung NLA General Election takok angua agitetsüsa amalitem akaba atema Department, kakat reju aser lokti tentet balala nem tenüngsang agüja liasü.

Iba senden nung Deputy Commissioner & Vice Chairman DPDB ajanga State Election Commission-i agütsüba ama ULB Election indang sentongtem tongmelang agi rateta ashi.

Chief Minister's Health Insurance Scheme (CMHIS) indang lepa reprangshiba mapang Deputy Commissioner ajanga tang district nung CMHIS atema registration agir aliba ya shilem 39 dang lir, ta metetdaksü.

Pai district HODs aser district nung sorkar mapa inyaker ajunga dang lepa reprangshitsü aser tekeratiba nung noklang shilem awajemtsü ayongzüka liasü.

Taoba DPDB senden nung lemtetba lepa reprangshiba mapang, District Hospital (IMDH) Road, Mokokchung yanglushiba osang Department of Urban Development nungi agüja liasü, kong mapang shilem 70 inyakogo aser tanünga mapa ya hopta ana tsüngta renemtsü, ta ashi aser iba nung DC ajanga department dang nüburtemi aginüba ama inyaktetsüsa temolung agüja achayangtsü shia liasü.

Iba senden nung Ao Senden tir Chubawati Longchar dena liasü aser paia District Hospital (IMDH) Road, Mokokchung yanglushitsü aser anepalutsü maparen asangsang akumtsü asoshi timtem jenti ajuruogo, ta ashi. Iba yongji pai department dang nüburtemi mapa tajung aginer aser junga meinyakra tatok magütsütsü, ta nenshia ashi.

Iba senden nungsa Yimyu-i Inter-State Bus Terminus (ISBT) belener aotsü jembishinüa liasü aser DC &

Vice Chairman ajanga Department ketdangsur dang tekeraba nung ISBT nung electricity aser water supply yanglushitsü asüngdang.

ISBT belener aoba ajanga jila nung traffic mesümenangba teblemtsü tajemba akumtsü, ta DC-isa ashi.

## Longleng nung Yuva Utsav 2023 mungogo

**Dimapur, Metsüremi/March 24 (TYO):** Ministry of Youth Affairs and Sports, GoI kübok Nehru Yuva Kendra Sangathan (NYKS) Longleng ajanga District Administration Longleng aser Yingli College, Longleng den lungjemer anogo ka Yuva Utsav sentong Yingli College, Longleng nung March 24, 2023 nü ayongzüka liasü, kong alakteta jaoker Trongdiba Tongpi Sangtam, SDO Civil, Longleng liasü.

Sangtam-i iba sentong nung jembidang lanurtem koda tongtipang aser lokti nung parnoki shilem agiba indang jembi aser ano lokti anema mapa tamajung inyakba agi tanü putu nung lanurtem dak kongshiba indanga jembia liasü.

Lanurtemi yimya

## Manual Scavenging atema Social Welfare ya Nodal Department asütsü

**Dimapur, Metsüremi/March 24 (TYO):** Taoba mapang Department ajanga sangdonga aliba ama SafaiKaramcharis/ Sanitary & Insanitary Workers densema The Prohibition of Employment as Manual Scavengers and their Rehabilitation Act, 2013 dak sendakba maparen ajak inyaksü atema Social Welfare

Department ya Nodal Department ama tanaben shimshir, ta sangdong ka ajanga ashi.

Item subject dak sendakba osangtsüsang ajak The Commissioner & Secretary, Social Welfare Department, Nagaland Civil Secretariat Kohima -797004, Nagaland dangi yoktsüla, ta sangdong ajanga ashi.

## Deputy Commissioner Tuensang ajanga Chongshen village semzüksü

**Dimapur, Metsüremi/March 24 (TYO):** Deputy Commissioner, Tuensang, Nokchasashi ajanga March 24, 2023 nü Chongshen Village semzüksü. Iba sentong nung tongti tesemdang ka ama jembidang iba yimtsüng kibur Chongshen Nyeba-i yimtsüng kumtetsü asoshi ali agütsüba atema pelaba lemsatepa liasü.

Yimtsüng tasen ajak nung ki-o-jen aser terenlok tsütsü timtem jenti ajurur, saka itemji telungjem aser amalitep ajanga kokteter, ta pai ashi.

Tongti tesemdangeri putu menden züngsemtem dang Nagaland Village Council Act, 1978 den lirumedema yimtsüng ketdang asütsü ajungshi aser yimtsüng nung terenlok maparen atema sentong

tajung yanglutsü ashi. Paise tarutsü nung nüngdakba mapang yaritsü department teti renema alitsü, ta ashi.

Iba sentong nung CKS tir Nusanglemba, VCC C/Khel Koma Yangbou aser CGOA tir Chingmak nungeri o tatsütsü jembia liasü.

B. Beshang VCC Chongshen Village ajanga tarur pela agizükba o jembi, Rev. Achu Chang, Executive Secy. CBLT ajanga temoatsü meshia aser meshiteta sarasademtsü aser W. Chollen-i melepzüng o jembia liasü.

Iba sentong nung anasa aliba yimtsüngtem nungi lenirtem aser Tuensang Town nung aliba ward aser arogo lenirtem dena liasü.

## Tseminyu nung Govt. school jenjang metettsü senden amen

**Dimapur, Metsüremi/March 24 (TYO):** SDEO Tseminyu ajanga Tseminyu kübok Government school tem jenjang metettsü aser tarutsü asoshi sentong balala yanglutsü atema school heads aser yimtsüng nung ketdangsurtem den senden ka March 24, 2023 nü Tseminyu Town Hall nung mena liasü.

Vikuto Semy ajanga Tseminyu district kübok school

tem sema jajaba indang osang agüsü aser iba mapang parnoki ajitetba government school tem nung Enrollment drive aser nüburtemi inyakba maparen balala indang jembia liasü.

Iba sentong nung menden Chegeseng Kath, AEO Tseminyu liasü aser Chubamenla Tep, SDEO Tseminyu ajanga tarur pela agizükba o jembia liasü.

Painting, Declamation, Photography nung tetoktepa liasü aser sobaliba yimya balala agi shilem agia liasü aser takok angur nem alakteta jaokeri sempet amoktsü.

Item tetoktepa nung takok angur nem State level aser National levels nung shilem agitsü maongka agütsütsü. Maneni Dr. B. Henshet Phom, Vice-Principal, Yingli College, Longleng ajanga melepzüng o jembia liasü.

Kishor Barman, District Youth Officer NYKS, Longleng ajanga "PANCH PRAN and India@2047" omen kübok iba sentong ayongzüka nükjidong lemsatepa liasü aser G20 Presidency aser iba omen "Vasudhaiva Kutumbakam" mesra "One Earth, One Family, One Future" indang rateta ashi.

Sentong nung Poetry,



Varanasi, March 24, 2023: World Tuberculosis Day anogomong nung Varanasi nung ayongzükba One World TB Summit nung Ato kilonser Narendra Modi, Union Health Minister Mansukh Mandaviya, Uttar Pradesh Angh Anandiben Patel, Chief Minister Yogi Adityanath aser Deputy Chief Minister Brajesh Pathak nunger tangokba noksa nung angur.

### Yaküm India nung 'organ transplant' 15,000 dak tema liasü

**New Delhi, Metsüremi/ March 24 (Agencies):** India nung coronavirus wara süiba sülen temang shilem transplant asüba kanga renlokogo; 2022 küm kija nung temang shilem transplant asüba 15,000 dak tema liasü, ta Union Health Secretary, Rajesh Bhushan-i metetdaksü.

Union Health Ministry-i ayongzükba "National Organ and Tissue Transplant Organisation (NOTTO) Scientific Dialogue 2023" sentong nung jembidang Bhushan-i, organ transplant asüba shilem 27 agi teimba kümogo, ta metetdaksü.

Taküm aika kümzüksü atema temang shilem tenla

agüja transplant asüba jenjang tajungba akümsü nükjidong nung iba sentong ya ayongzük.

Bhushan-i, coronavirus wara sülen organ transplant asüba kanga renlokogo, ta metetdaksü.

Organ transplant tsütsü tang aliba inyakim aser telatetbatem tajungba akümsü nungdak, ta shia health secretary-i, "Tang asenok sorkar level balala nung inyakim lir; linük level nung NOTTO lir, state level nung SOTTOs lir aser regional level nung ROTTOs lir; parnoki tajungtiba inyaktsü atema inyakim asadangtsü nungdak," ta metetdaksü.

Paisa, healthcare tsütsü

mongintem atema orientation aser re-orientation training programme maneni agiba den külemi courses tasen aser digital amshitsü nungdak, ta ashi.

"Training programme denji külemi osangkakettem aser electronic media ajanga awareness agütsüba dang masü saka stakeholders aser melungtet teloktem den amalitepa inyaktsüla," ta Union Health Secretary-i metetdaksü.

Bhushan-i, "Medical hospitals & colleges 640 dak tema lir, ajisüaka hospital kar nung dang organ transplant asür, anungji surgery agia temang shilem balala transplant asütsü atema hospital tali bendenloktsüla," ta ashi.

### Ita 2 tsüngda wara agi shiranger shilem 50 dak H3N2 liasü: Centre

**New Delhi, March 24 (Agencies):** ICMR survey ka ajanga, tesüiba ita ana tsüngda linük nung tangu sashiba tsütsü timtem ajangshia (respiratory infection cases) hospital nung amongertem shilem 50 dak H3N2 influenza liasü, ta Hokolbarnü sorkari Lok Sabha nung metetdaksü.

Taküm January 1 nungi tenzüka March 20 anogo tashi nung nisung 1,161 dak H3N2 puteta liasü; iba ya seasonal influenza virus indang subtype ka lir, ta Minister of State for Health, Bharati Pravin Pawar-i metetdaksü.

Tasüngdangba ka langzüdang laisa, H3N2 influenza agi shirangertem teimbaka aketba den külemi temang meta-a liasü, ta ashi. Minister-i, H3N2 ya viral

respiratory infection ka lir aser iba wara agi shirangertem treatment agiba nung antibiotics mozü shilem mali, ta metetdaksü.

Ajisüaka lai, khenkhenbo respiratory infection nung bacterial infection-a adoktsüa akok, anungji doctor temi secondary bacterial infection atemaji antibiotic mozü agütsütsüa akok, ta ashi.

Union Minister-isa, H3N2 teimtiba putetbaji Delhi (370) nung liasü; iba sülen Maharashtra (184), Rajasthan (180) aser Karnataka (134) state tem liasü, ta metetdaksü.

Pawar-i, Health Ministry-i iba tensa mita repringdar aser H3N2 densema wara balala anema raratsü atema states aser UTs nungita yarir, ta metetdaksü.



March 24, 2023 nü Bengaluru nung Union Home Minister, Amit Shah-i Sahakar Samridhhi Soudha atema foundation lung azüngtsüba den Department of Cooperation (Karnataka) indang terenlok project balala semzüksüdang tangokba noksa nung angur.

### Rahul Gandhi LS nungi anentsüba atema opposition-i sorkar aitsür

**New Delhi, Metsüremi/ March 24 (Agencies):** Tenüing menüksüba ken o ka nung Gujarat kübok Surat yimti nung aliba court kati Congress party lenir, Rahul Gandhi aitsüba sülen anogo ka lir pa Lok Sabha nungi anentsüogo.

Lok Sabha Secretariat-i notice ka ajanga, pai aitsüba anogo- March 23 nungi pa House nungi anentsür, ta metetdaksü.

Iba dak sendakba nung Congress MP, Shashi Tharoor-i, "Iba inyakim ajanga ni süngmanger. Court-i obendang agütsüba sülen temepishiba ken o ka benoktsü atema teinyakdak, ajisüaka ghonda 24 tsüngda pa anentsüogo. Iba ya teka agi anar politics asayaba lir aser iba ya asen democracy shirangba lir," ta metetdaksü.

Osangbener den jembidang Congress Tir, Mallikarjun Kharge-i, "Parnoki (BJP) pa anentsütsü atema ajak merandangogo. Parnoki ochi jembirtem meyuner saka onoki maneni ochi jembitsü. Onoki maneni JPC [Joint Parliamentary Committee] akhangtsü. Democracy kümzüksü atema nungdak dang süra onok jail-ia aitsü," ta metetdaksü.

Congress party dang masü saka opposition party balala nungi lenirtemia Rahul anentsüba atema BJP-i aniba Centre sorkar aitsüogo. TMC tongti lenir aser West Bengal chief minister, Mamata Banerjee-i, linük nung opposition

lenirtem ya BJP atema tongti tsükchir kümogo, ta ashi.

Mamata-i twitter ajanga, "Ozüng alema inyaker BJP lenirtem cabinet nung shimoker saka Opposition lenirtembo parnoki jembiba o atema anentsür. Tanü asenoki asen linük democracy tsünglangleni aluba angur," ta metetdaksü.

Shiv Sena lenir aser MP, Priyanka Chaturvedi-i, "Rahul Gandhi anema taaktsü meketi inyakogo. Pa anentsüba ajanga shibanga ayuba democracy tensa ka nung asenok lidar, ta maneni kuli sayur," ta ashi.

Taoba mapang Maharashtra chief minister, Uddhav Thackeray-i, auertem sademsadema senzüdaksüdang Gandhi nem temerenshi agütsür; iba ya democracy tepsetba lir, ta ashi.

Osangbener den jembidang Thackeray-i, "Rahul Gandhi anentsüogo. Auer ka dang auer, ta ajaba ya asen linük nung ozüng alema inyakba mapa ka kümogo. Auertembo sademsadema senzüdaksür aser Rahul Gandhi nem temerenshi agütsür," ta ashi.

Kerala Chief Minister, Pinarayi Vijayan-i, Congress lenir Rahul Gandhi Lok Sabha nungi anentsüba ya Sangh Parivar-i democracy amakba lir, ta aitsü.

"Tashiyim amshia ola nembangtsüba ya Fascist inyakim lir," ta pai ashi.

AAP tongti lenir aser Delhi Chief

Minister Arvind Kejriwal-i, iba osang ya taoksatsüka lir aser tang asen linük ya kanga tamajung tensa ka nung lir, ta ashi.

Delhi Assembly nung jembidang pai, BJP-i kanga tsübur, ta ashi.

Tesülen osangbenertem den jembidang Kejriwal-i, "Iba ya shisabulutsü tensa ka lir. Iba rara ya Congress mesüra Rahul Gandhi atema dang masü saka opposition ajak atema rara lir," ta ashi.

Kejriwal-i, BJP-i linük nung party ka dang lidaktsüner; iba ya kijai yimsüsüba lir aser BJP sorkar ya linük nüchiso mangudang British nunger yimsüsürtem dang nungi lendong taketiba lir, ta ashi.

Brihostibarnü (March 23) 2019 küm tenüing menüksüba ken o ka nung Surat nung aliba court kati Rahul Gandhi aitsü aser küm 2 tepuokdak ayutsü obendang agüja liasü.

Ato kilonser, Narendra Modi aitsüba olen ka nung 2019 küm Karnataka kübok Kolar nung election nüboyim sentong ka nung jembidang Rahul Gandhi-i, 'kechiba auer ajak tenüing nung Modi densema lir' ta jembia liasü.

"Nirav Modi-a süang, Lalit Modi-a süang mesüra Narendra Modi-a süang, kechiba auer ajak tenüing nung Modi densema lir?" ta Gandhi-i jembia liasü.

Surat Court nung Chief Judicial Magistrate, HH Verma-i iba ken o nung Gandhi aitsü aser küm ana tepuokdak ayutsü obendang agütsü.

Form No.3  
[See Regulation-15(1)(a)]/16(3)

**DEBTS RECOVERY TRIBUNAL GUWAHATI**  
Suwarna Bhawan, House No.12, New Town Path, Near Hanuman Mandir,  
G.S. Road, Ulubari, Guwahati-781007 (Assam)

Case No.: OA/250/2022

**Iba Act nung section 19 kübok sub-section (4) nung ajemdaker jaoker, Debt Recovery Tribunal (Procedure) Rules, 1993 indang Rule 5 kübok sub-rule (2A) den azüngtsü akok.**

Exh. No.: 3015

STATE BANK OF INDIA  
-VS.-  
**M/S. A N HARDWARE**

To,  
(1) **M/S. A N HARDWARE**  
(Proprietorship firm) House No.96 United North Block-B Burma Camp,  
Nagaland, Dimapur, NAGALAND - 797112  
(2) **SMT. ANELIE VENUH @ SMT. NEIWETE-U VENUH**  
(PROPRIETOR OF M/S A N HARDWARE) DAUGHTER OF NEIHU VENUH  
HOUSE NO.96 UNITED NORTH BLOCK-B BURMA CAMP, DIMAPUR, NAGALAND  
Also At  
TENYIPHE - 16TH MILE, DIMAPUR, NAGALAND - 797112  
(3) **SRI NGORE SEKHAMO**  
SON OF LATE KEWEGOLO SEKHAMO HOUSE NO.96 UNITED NORTH BLOCK-B  
BURMA CAMP, DIMAPUR, NAGALAND-797112  
Also At  
TSUFUME VILLAGE DISTRICT - PHEK NAGALAND - 797108

**JAOKER**

**10.03.2023** anogo nung Hon'ble Presiding Officer/Registrar matsüngdang OA/250/2022 benoka liasü.  
**Rs. 2856316.68/-** sentsüh atema iba Act kübok section 19(4) application nung ajemdaker na anema (OA) benoka Hon'ble Tribunal-i jaoker/ notice agütsür (application den documents copies densema lir).  
Iba Act nung section 19 kübok sub-section (4) nung ajemdaker defendants dang teküboklen aliba tetuyuba agütsür:-  
(i) Iba case defend asürtemi tajaba agütsüba sülen anogo semer nü tsüngda relief asoshi mepishibaji kechiba magütsütsüla, iba kuliji sayutsü metetdaksür;  
(ii) Original application nung serial number 3A kübok applicant-i shia aliba kiojen aser assets dak alia tanga kiojen aser assets sangdongtsüla;  
(iii) Original application nung serial number 3A kübok shia aliba kiojen aser assets ayoktsü mesüra item kiojen atema inyakshangshitsü memelar;  
(iv) Security interest atema inyakshangshiba dak alaka Tribunal dang nungi jelia temelaba magii original application nung serial number 3A nung shia aliba kiojen mesüra tanga assets ayoktsü, lease asütsü mesüra tanga kecha inyakshangshi masütsüla;  
(v) Ordinary business ajanga secured assets mesüra tanga assets aser kiojen nungi yokzükba senji security interest soita aliba bank mesüra financial institutions indang account nung deposit asütsüla. Nü dang tezüluba nung sangdong applicant nem agütsütsü tuyur aser **26.04.2023** anogo nung **anepdang 10:30 ako** nung Presiding Officer matsüngdangi arutsü tuyur, yamaji meinyakra applicationji angadangtsü aser na meliaka telemtetba agütsü.  
**18.03.2023 anogo nung tsünglanglen kü meyongnem den iba Tribunal indang seal agütsür:**

Registrar i/c,  
Debts Recovery Tribunal,  
Guwahati.



## TIR YIMYIM YIMOBILEM (EDITORIAL)

DIMAPUR

KÜPTOKNÜ,

METSÜREMI 25, 2023

### Tatar senden junga tenzükogo

**N**agaland tatar senden 14 buba kümtetba sülen mezüing senden sentong nung Nagaland angh tasenbai yimten sobaliba dak aketba ama, Nagaland state government-i inyaka aruba aser inyaka aotsüba onük aser mapatem indang ken o benokba nung ajemdaker tatartem rongnung pei pei tebilemba aser tangatetba ken o benoka jembitepba agi senden lemlalemlaa kümdaktsüba angur. Tatar senden ya pei linük aser nübertem asoshi inyaka aotsüba ken o ajak sadaka yur tatartem telemtetba agitsü asoshi ayongzükba senden lir, anungji tatartem shiai pei tebilemba lemsateptsübaji kanga tongtibang akümer. Atangji, tatar ajaki shilem agitsüsabo mapangi memelatsü, anungji pei pei yimten telok rongnungi nisung ka ana shimtetter jembidaktsür. Aji oda, nübertemi temulung lemteta shimtetba tatartem rongnung tatar senden nung jembitsü mapang anguba aser jembitepbaji maongka tulu aser jangratemtsüka lir. Tesasatsüka, Nagaland nung mapang kabo tatar senden nung tejembitsü maka minute 25 nung senshiadokba otsüa lir. Ano, tatar senden amenba yimya nung tatartem asoshi tezüdangtsükaji, Independent nung adoker opposition menden nung amenba tatar ka mesüra yimten telok nung züngsemba tatar shiaji pei telok nükjidong, tebilemba aser tangatetba agi alena lir, anungji pei jeminüba masü pei teloki mulungba jembitsüsa akümer, idangji aiben tai dang tai ta meshitetter. Iba jagi tatar aika pei yimsüsüba mapang tatar senden nung pei tebilemba meshiteti ali mali memetetka temadoker. Atangji, mapanga anguyonga aser jeminüyonga pei yimten aser nübertem otsü aser temeten memetetra aser temulungjang nung nübertem asoshi inyaksütsü nüngdak kecha bilema melira, kechi jembitsü ? Ashiko, teshimtetbo nübertemi shimtet saka pei kolok aser temulungjang nung kecha mali tazüing arua amener tatartema karbo alitsüa akok, item jagibo shisa tasen ka bener arua magütsütetba dang masü saka tangari nübertem akoksatsüsa inyakba taitem aputsüa makoktsü. Nagaland tia ajung, tang Nagaland tatar senden nungbo nübertem meimba, shisataka aser tashitemetet tatartem aika angur. Item jagi tanü Naga nungertimtemdaksüba Naga yimten tebilemstsü aser mapa ajak nung ochimashiba tebilemstsütem ajak kokteta jembia aotsü imlar. Tezülen tapu aika jembiyonga, pei lima aser nübertem asoshi tagitsübo tatar senden nung jembiba aser lemtetbaji dang asütsü. Aji oda, tatar senden nung government kübok nübertem asoshi sentong tajung shitak shitak inyaka aotsü ken o süoka mejembira, kong jembitsü aser kechi koda mapa tenzüka aotsü ? Kasaji, pei lima aser pei govetment kübok anü meraa pua auyateper aser itemji anema nübertemi ola madoktetter, kechiyong nübertemang ochimashiba kümer lir, iba ama mapang tamajung ka nung nübertem akoksadaksüba ochimashi mapatemji anema tatar senden nung tatartemi ola madokra, ochimashi anema kong jembitsü aser koba tongpang nung nokdaksü ? Tanü Nagaland tatar senden nung tatar shingaia opposition nung memenüba tangatetba aser jakla ngur nübertemi tezüdanga bilemer. Ajisüaka, tang mezüing senden nung NPF tatar anati anir government nung alir tatartemi dena pei lima aser nübertem jungdaksütsü asoshi nüngsen tizükteta, Naga yimten tebilemstsü indang ken o den ano terenlok mapatem dak aketba ken o benoka asüngdangba aser tebilemba lemsatepbatem jagi opposition maliyonga pei sünütsü süa inyakba government-bo masütsü amai teimla tajung ka sayuogo. Atangji, government-a nübertemi akümba government, anungji government nung kiburjibo nübertem aser opposition nung alirtemjia nübertemi shimtetba tatartem, anungji government nung alir anishitsübajia nübertem dak tashi lir aser opposition nung alir tatartem ajungshia inyaksübajia nübertem dak tashi lir. Iba tashiji amshia nübertemia Nagaland tatar senden ya shitakba yimten ken o aser nübertem nüngdak süoka jembidak aser lemtetdak menden kümdakja shilem agitsü imlar.

## OLEMSABANG

### ENPO-i telemtetba tajung agitsüla

Odi Jamir & S. T. Yapang Lkr, Kohima.  
9612800973 / 9856714829

ENPO nübertemi State balaka meshiaka centre-i Autonomous Council mesüra 'Senotsü Kohima ajanga masü ENPO limai dang aittsü' ta asüba amala ang kar agütsütsü akok, ajisüaka senotsü Kohima ajanga masü ENPO limai aruba kija jaki meperitsü, onükji jembir mejembima aser zülur mezüluma kar. Tanü yangi noksa tilaka lemsateper, ibai DUDA ajanga langzüba RTI NO.DUDA/RTI-256/08/part-III nungi asenoki metettsü asoshi tapak ka lemsateperba dang. Iba noksa nung jangja angur, tenüngbo Under Developed Area/ Backward area asoshi sen ya arur, saka item achayanger (implementing Agencies/organization) timba ENPO tesem nungi masü. Anungji tang centre den jembishinüba ajanga Eastern Nagaland asoshi langka tajung atalokra idangjibo ENPO area asoshi aruba senotsü nungi tangjangzük agirtem, mapa inyaker aser implementing agency/organization ajak ENPO pur dang asütsü ozüing yanglutsüla, aser 'ENPO pur shibai tangar den teka amteper item senotsü amshitsüsa sentong yangludir pa/la ENPO lima nungi aritoktsü' ta temzüing renema ayutsüla, ajimesüra Eastern Nagaland kodanga tejakleni maotsü. Tang kecha melemsai Nagaland Govt. külemi aliba mapang nung yaa DUDA nungi ENPO area asoshi aruba senotsü amshiba ajak kasa tekalen ashiba temzüing yanglutsü tim ta ajiteter.

#### 2015-16

Sl.No. 04.NO/FIN/EXA/DA/DUDA/2015-16/TS-410 : Implementation of Non Civil Works amounting to 5,85,50,000/- dated 15th Febuary 2016

Sl.No. 05.NO/FIN/EXPDR/DUDA/2015-16/BC/960 : Implementation of Non Civil Works amounting to 5,85,50,000/- dated 16th March 2016

Sl. No.	Name of works/schemes/programme	Implementing Agencies/Organisation	Budget Provision
<b>A</b>	<b>Research and Planning</b>		<b>190.00</b>
a	Establishment of Retail outlet for products of ENPO areas at Eco Green village, Tsiepama	Zynorique Initiative Society, Kohima	40.00
b	Multi skill development training for backward tribe girls	Tabitha Craft & Design, R/Centre, Dimapur	40.00
c	Advanced training on Cane & Bamboo furniture & handicraft	Nagaland Bamboo R/Centre, Dimapur	50.00
d	Life & livelihood skills building club for college students in selected colleges of Eastern Nagaland	Department	5.00
e	Seminar & Workshops on various issues spread across all ENPO areas	ENWO & NGOs	30.00
f	Research on medical plants & herbs	Department	15.00
g	Special grants	Department	10.00
<b>B</b>	<b>Dev. Of health, education, livelihood &amp; Micro financing through community participation ECS</b>	Eleutheros Christaan Society, (ECS) Tuensang	<b>100.00</b>
<b>C</b>	<b>Mobility provision for Monitoring &amp; Evaluation</b>	Department	<b>65.00</b>
<b>D</b>	<b>Capacity Building</b>	Zynorique Initiative Society, Kohima	<b>245.00</b>
<b>E</b>	<b>Provision of Solar street light in ENPO areas</b>	Department	<b>200.00</b>
<b>F</b>	<b>Non-Civil Works</b>		<b>371</b>
		<b>(A+B+C+D+E+F)</b>	<b>1171.00</b>

(Rupees Eleven Crore Seventy One Lakh) only

Anosa Directorate of Under Developed Area RTI telangzüba nungsa ashiba agi department-i Backward Area nung lemtsütsüba solar light aliba aser installation nung 2015-16 nungi 2018-19 tashi nung sen 627.64 lakh indok, saka ya sensakeri shishilembar ajangzükdaksütsü asoshi sen timba indoktsü sentong yangluba ka mesüka liasü. Kechiyong New & Renewable Energy nungi iba mapang ya 1st phase nung sen 6800 shi aser 2nd phase sen 9300 shi agi subsidise nung agütsü, yangji transportation aser installation ajak densema liasü, saka DUDA puri aliba solar light ka jenjangji 1,011,800 shi sayua lir, aji transportation aser installation densema, iba Solar light ya Dimapur nung dokan ka nung ali. ENPO/Under Developed Area tenüing nung aruba sen den mapa sütepa aotsü asoshi ENPO nübertemi telemtetba tajung agitsüla.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerer angateta agitsü mepishir**

# Niger nung America nung missionary ka küm 6 sülen chiokogo



Olivier Dubois (abelen) aser Jeffery Woodke na noksa nung angur.

**March 24, 2023:** Küm ishika tejaklen Niger linük nung California nungi missionary, Jeffery Woodke aser France nung journalist, Olivier Dubois na Islamic kiralongrar telok kati pua liasü saka tawa tu chiokogo. McKinlyville nungi missionary, Jeffery Woodke ya 2016 küm October ita nung apu saka tan ita chiokogo, ta Hombarnü par Arogo Arcata First Baptist Church-i Facebook post ka ajanga metetdaksü.

Woodke ya Youth With A Mission (YWAM) nung inyaka liasü.

"Jeff chiokba sülen pa jakdang tayongzükba aika aliba mapang nung pa atema sarasademjang. Tsüngremi onok dang ajungba atema kanga pelar," ta Arogoi metetdaksü.

White House National Security Advisor, Jake Sullivan-ia Twitter ajanga, Woodke aser France nung osangbener, Olivier Dubois na chiokba atema pelar, ta metetdaksü.

Sullivan-i twitter ajanga, "US nungi Jeff Woodke küm 6 dak tema pua ayuba sülen chiokba atema ni pelar. Pa chioka par kibong den longjemdaksüba atema U.S-i Niger dang pelar. Pa chioktsü atema ozü sorkari kanga meranga inyakba atema

pelar," ta metetdaksü.

Ano France nung journalist, Dubois-a 2021 küm April ita nung kasa kiralongrar teloki pua liasü. Osangbener den jembidang sorkar ketdangser kati, kiralongrar teloki akhangba ama sen magütsü, ajisüaka küm aika yimtenren ajanga inyaka aruba ajanga pa chiokogo, ta metetdaksü.

2016 küm Niger kübok Abalak nung kiralongrartem Woodke'er kidangi arua pa tanükertem tepsetba sülen pa puer ao. Tesüiba küm 30 tashi Woodke-i US aser Niger na tsüngda oli-aruli ta liasü. Niger linük nung pa tzübo aser school aika amenoktsüogo.

Arcata First Baptist Church-i ketdangsuba Redwood Coast School of Missions nung pa instructor inyaka liasü. Iba school indang website nungji Arogoi yamai shia lir, "Jeff Woodke ya Arcata First Baptist Church nung inet. Pa Humboldt State University nung azüngba mapang nung pai Khrista nem pa taküim bendanga agütsü."

"Jeff-i alima nung kanga sensaktibatem aliba tesemtem nung teyari agütsütsü tejangraba liasü, iba denji külemi Muslim lima nung Tsüngrem

yimli amenoktsü atema pai tongti shilem agiba den AFBC wadang nung tongtibang shilem agiogo," ta Arogoi metetdaksü.

Woodke ya Islamic State indang West African affiliate al-Qaida teloki apu asütsüa akok ta bilemer.

Open Doors USA-i ashiba agi, Niger ya Muslim nung nütstung teimba aliba linük ka lir, aser iba linük nung Islamic kiralongrar telok aika lir.

Tang alima nung Khristantem alitsü tamajungtiba linük 50 rongnung Niger ya jenjang 28buba nung lir (2023 World Watch List).

"Tesüiba küm pongu tashi Africa kübok Sahel region nung Islamic kiralongrar teloki timtem agütsüba kanga bulua kümogo. Talisa Boko Haram, Islamic State's West Africa Province (ISWAP) aser Al-Qaeda in the Islamic Maghreb (AQIM) teloktem ya sorkar ketdangsertem aser Khristantem atema amokmeren ka kümogo," ta Open Doors-i metetdaksü.

"Islamic teloki aziükba arrtsü tesemtem nung kiralongrar teloktemi Khristantem adenshiba nokdang, anungji Khristantem miima dang tekülem agir," ta Open Doors-i metetdaksü.



35 Buba Jangpetkong Baptist Pastor, Associate Pastor Women Telongjem (JBPAWPT) mungdang March 21-22, 2023 anogotem Waromung Baptist Arogo nung kanga temoatsü agia mungogo. Iba mungdang nung arogo 13 nungi Pastor aser Associate Pastor aser Associate Pastor Women 24 dena liasü. 2026 küm Yimjenkimong Baptist Arogo nung JBPAWPT Golden Jubilee amongtsü lir.

# ANO GO ABEN TSÜNGREM DEN

## Aonung Sensaksem

T.Ken 77:1-6

Mapang kar amangji asenok dak alir. Tasü mait arudaktsür, aser asenok Asaph ama akümer, shibai ashi, "Kü timtemba anogo nung ni Kibuba bushir; aonungji kwika maneni songlao liasü; kü nelai ani mesüngzükünü" (t.2). Ne nelai animesüngzükünü dang nai kechi inyaktsü ?

Asenoki kechi inyaktsüla Asaphi ashir. Mezüngbuba, "Kü nulai, oda Tsüngrem dang kü ola agi ni Tsüngrem dang ayimtener, aser Pai kü dang angashi" (t.1). Kari ashir, kodang na aonung memejangtetlir, san azüngdang nungi, Sannüker den jembidang. Asaphi yamaji inyak. Mapang mapang nung Kibuba dangi aotsü timtem adoker. "Ni Tsüngrem bilemtetter, aser shisa bulur" (t.3). Pa timatemtsüsa pai Tsüngrem indang kechi bilemtetter? Tebilem nung ozüng ka nung tashi mangai alitsü mesüra tenangzükba ka nung arendaka alitsü. Mesüra pai Tsüngrem koda temeshi aser pa koda temenen bilemtetter alitsü.

Saka Kibuba den jembiba jagi tejangja angatetdaksür. "Ni alemli mapang, aki tendak, indang bilemdangogo" (t.5). Tanga o ka nung, Tsüngrem dak amangtsü akok. Ali mapang pai na anebalua liasü, aser na tarutsü indang pai anebalutsü.

Tanabuba, ne sasa den jembidang. "Ammang nung ni ken ken bilemtetter; ni kü mulungjang den jembir; aser kü nelai kümdanga bushir" (t.6). Kibuba indang ne sasa den jembidang. Ne taküm aser ne Khristan taküm jajaba tendangang. Ne tasü mait ken agi melentsütsü. "Ammang nung ni kü ken bilemtetter" (t.6).

Kodang na tasü meiti kümdar, ne nuk meketa aliba tia nung meyiper Kibuba dak ranglokang. Ne taküma tendangang. Nai Kibuba dang tashi mangai lir asü ? Pa den jembidang aser Pai na tasü itdakjang. Idangji ne sasa den jembidang aser ne sasa Tsüngrem mapa nung tasü itang. Pai ne nem ammag nung ken ka agütsütsü.

# Khristantemi longkak aitba sülen Netanyahu-i bill ka nokdangogo

**March 23, 2023:** Küm 2,000 tejaklen Khristan yimsü tenzükba linük (Israel) nung bill ka anema alima tesem balala nungi Evangelical Khristantemi ola adokba sülen Israel Ato kilonser, Benjamin Netanyahu-i iba bill ji nokdangogo.

Netanyahu-i twitter ajanga Ibri aser English oshi naprongla nung, "Khristantem anema onoki ozüng (bill) kecha mebenoktsü," ta metetdaksüogo.

Israel nung parliament 'Knesset' nung bill ka benoktsü sentong liasü. Iba bill ji agizüka ozüng kümra Khristantemi tangar kar yimsü meyipdaksütsü atema inyakba maparen ajak nokdangtsü liasü, aser iba ozüng kübok aibelenertem küm 2 tashi tepuokdak ayutsü liasü.

All Israel News-i iba bill indang osang sangdongba sülen alima tesem ajaklen nungi Evangelical Khristantemi iba bill anema ola adoka liasü.

Ultra-Orthodox United Torah Judaism party-i taküm January ita nung Knesset (Parliament) nung iba bill

tanaben benoktsü meranga liasü.

'Proposed Penal Law: Amendment - Prohibition of Solicitation for Religious Conversion - 2023' ta ajaba Bill ji United Torah Judaism nungi Moshe Gafni aser Yaakov Asher nati benoka liasü.

Iba ozüng kübok nisung kari dangi pei tamangba yimsü nisung kar nem agizükdaksütsü merangra temerenshi agütsütsü, ajisüaka iba bill nungji Khristan yimsü dang tetshia lir, kechiyong tawa missionary temi nüburtem Khristan yimsü dangi meyipdaksütsü atema inyakba kanga bulua kümogo.

Iba Bill kübok nisung kati tangar ka ajurua mesüra digital ajanga, mail ajanga mesüra online ajanga yimsü meyipdaksütsü atema meinyaktsüla, aser iba ozüng kübok aibelenertem küm 1 tashi tepuokdak ayutsü; aser tanur ka yimsü meyipdaksütsü merangra aibelenerti küm 2 tashi tepuokdak ayutsü akok.

Ajisüaka Israel Ato kilonseri iba bill nokdangogo. (Maneni tapak 8 nung...)



# US-i Syria nung tayimtsü amshia amakdang nisung 11 asü

**Damascus, Metsüremi/ March 24 (Agencies):** United States mitkar temi tayimtsü amshia Syria anüdoklen Iran den sendaktepa aliba telok amak, shirnoki drone amshia amakdang contractor ka tepset, ka yirutsü aser US sepai pongu yiruba tai tonglokja lir.

Taoba mapanga Syria nung aliba American sepaitem dak tenük yoker drones amshia makaka asü-amaba kangabo mali.

Syria northeastern tsütsü Hassakeh anasa US-i anir aliba coalition dak tenük yoker nikongdang 1:38 ako nung unmanned aerial vehicle amshia amakba tayang kepzüka US sepai temi amakdang pro-Iranian fighter 11 tepset, ta United Kingdom nung amenoka aliba rara asadanger temi ashi.

US itdangiter temi iba drone ya Iran nung yangluba lir ta asadangtet. Syria anüdoklen Iran indang Islamic Revolutionary Guards Corps (IRGC) den sendaka aliba teloktem dak tenük yoker amak, ta US Defence Secretary Lloyd Austin-i ashi.

"Tanü amakba aser tawa Syria nung IRGC den affiliate

süa aliba telok temi Coalition forces anema amakba langzüka tayimtsü amshia amak," ta Austin-i Brehostibar aonung sangdong ka nung ashi.

US Tir Joe Biden totuyuba kübok tayang kepzüka amaktsü ni mela, ta pai ashi.

"Asen nübur kumzüka ayutsü aser aseni molungba mapang aser tesem nung teti telangzüba agütsütsü ta Tir Biden-i tejangja shia lir. Telok shingaiya asen sepai dak maker memerenshi medoktsütsü."

Syrian Observatory for Human Rights (SOHR) ajanga ashiba agi, linük anüdoklen Deir Az Zor yimti nung America nungeri amakdang Iran nungeri busemba 'fighter' trok tepset.

Mayadeen jila anasa post ka nung US-i amakdang ano nisung ana asü aser Iraq den arütsülen Boukamal jila anasa military post ka nunga nisung asem tepset, ta SOHR-i ashi.

Iran indang state Press TV-ibo iba lendong nung Iran nunger kata masü aser ibai Iran den sendaktepa aliba military post amakba masü saka rural development centre ka aser military airport anasa jang o tzi ayuba tesem ka amak, ta ashi.

Iba lendong atalokli tensa azüoktsü meranga yimtenren tsütsü jembishinü aka tenzük. Osang ka ajanga ashiba agi, Qatar indang foreign minister Sheikh Mohammed bin Abdulrahman bin Jassim Al Thani-i US national security adviser Jake Sullivan den phone ajanga jembi. Tehran indang nuclear sentong mechi Doha ya Iran aser US tsüngtai ia yimjung yanglur ka ama lir.

Kasa mapang Qatar indang foreign minister-i Iranian Foreign Minister Hossein Amirabdollahian den jembi.

ISIL (ISIS) telok den raraba nung allied forces tem yaria US sepaitem Syria nung 2015 kum tetsüng ajemok.

Hassakeh anasa amakba US sepaitem aliba ya tesem ya US-i anepalur aser US sepai 900 shi Syria nung lir aser iba dang timba contractor tem Syria north, south aser east len lir.

Aonung tangokba video tem social media nung prokshiba nung Deir Az Zor nung apokba nguogo, koba province tongtipang ka lir aser Iraq den arüa lir aser yangji totzü atsüba tesemtem lir.

(Maneni tapak 8 nung...)

# N.Korea-i underwater nuclear attack drone tasen ka tendang

**Pyongyang, Metsüremi/ March 24 (Agencies):** North Korea-i underwater nuclear-capable attack drone tasen ka tendangogo, koba agi "radioactive tsunami" adoka tsükchir indang rong aser rongnendak tesemtem samatsütsü-, ta state media ajanga ashi.

Linük lenir Kim Jong Un lenisüba kübok tan hopta milirary exercise ka nung North Korea indang mitkar temi iba nok-nü tasenba tendang, ta KCNA ajanga Hokulbarnü ashi.

"Iba nuclear underwater attack drone ya tziükum mesüra rongnendak tesem mashi nung yoktettsü aser operation atema tziüma nung jajaba rong kati atsür otettsü," ta KCNA-i ashi.

Iba exercise agidang drone

ya South Hamgyong province anasa tziü nung Mongulbarnü yutsü aser ghonda 59 sür minute 12 tashi tziü telung metre 80 nungi 150 tsüngta tarok nung jaja aser anüdok tziükumlen Brehostibarnü apok, ta ashi.

KCNA ajanga iba drone nung nuclear tashi bentettsü indang tali rasa mashi.

Iba underwater drone system ya tsükchir tziüyim nung atsükshia amaktsü aser naval striker groups aser tongtipang rongnendak tesemtem raksatsütsü asoshi lir, ta news agency ajanga ashi.

Iba drone yagi Hongwon Bay nung tsükchir indang rongnendak tesem ama yanglua yur aji raksatsü, ta South Korea meyong Yonhap News Agency ajanga ashi.

"Freedom Shield" nungja agütsür joint military drills atema South Korea nung US amphibious assault ship ka arua atongba sülen iba drone exercise agiba osang angashir. Pyongyang-i kodanga meinyakdangba nok-nü tendanga arur US aser South Korea tsüngta defence cooperation tembang aser March 13 nü ano kum pongu tsüngta joint military exercise tulutiba saya liasü.

Taoba hopta tatemlen linük ana yagu US B-1B strategic bombers densema anung aser tziüyim nung drills agia liasü. Parnok indang tziüyim sepaitem aser marine corps temi Ssangyong amphibious landing exercises tenzüktsü lir. Iba drills ya April 3 tashi agitsü.

(Maneni tapak 8 nung...)



## Office of the LION'S CLUB LONGSA

### Konang Tetushi Agütsür

Oscar & Grammy Award Winner, A.R Rahman-i achayanga agiba NEXA Season 2 tetoktepa sentong nung 'Singing/Song Writing Competition' nung Wb. Sünep A Jamir (S/o Akangkokba Jamir)-i 4 Super Winner jenjang tongteta takok tulu bener arutsüba asoshi, Lion's Club Longsa-i konang tetushi lemsateper. Asen teyanglur Tsüngremi ne taküm, sempet aser ne wadang ajak nung maneni moajangma ta sarasademtsür.




Sd/- Nungsangtemshi President

Sd/- Limatemshi Secretary

## COMMERCIAL LAND FOR SALE

Location: **Niuland Highway Attached**  
Adjacent to upcoming Mega Water Park  
**Hozukhe Village, Niuland**  
100x100 @ 4.50 lakhs  
**Land Available upto 50 Bighas**  
Payments can be made in 2 installments



FOR DETAILS CONTACT : 9862954673

# Asylum bushirtem magizüktsü US aser Canada pangjemer

**Ottawa, Metsüremi/March 24 (Agencies):** Temelaba makai arütsü alemba tesemtem nung asylum bushirtem magizüktsü atema US aser Canada tezüngzüktep ka yangluogo, ta ketdangsür temi ashi.

Migrant aika temelaba makai US-Canada arütsü nung Roxham Road alema senzür.

US den 2004 kum asylum agreement ka yangluba nung tapok adoka aliba tang shibangtsür.

2004 kum yangluba agreement ajanga unofficial crossing points nung masü saka official points of entry nungi migrants tem meyipa yoktsü Canada dang mela.

Iba tezüngzüktep tasenba kübok tangbo Canada-i South aser Central America nung azüdokshi aser reshikangshi nungi jena arur migrants 15,000 atema refugee sentong tasen yanglutsü melar, ta US ketdangsüri ashi.

Biden ya Ottawa, Canada nung ghonda 24 atema oa lir aser iba mapang pai Canada Ato Kilonser Justin Trudeau den rongsenketzüng, shishilempaba aser immigration ken o balala jembitsü.

Iba Immigration accord ya pa US-i Hokulbarnü meyipa marudang sangdongtsü lir.

Iba tezüngzüktep ya ajanga arütsü anatsülen ketdangsür temi asylum bushirtem meyipa

yoktsü melatsü imlar.

US tsütsü nungi Canada-i migrant tem aoba tali kumogo.

New York state aser Quebec province tsüngta aliba Roxham Road nung migrant tem tali senzüba ajemdaktsütsü merangba nung iba mera ya shilem ka alitsü.

Ibai linük ana tsüngta 2004 safe Third Country Agreement (STCA) yanglushiba ka lir, kong migrant temi US nunga süang mesüra Canada nunga süang, parnoki mezüng atongba linük nung asylum bushitsü melar.

STCA yagi US aser Canada ketdangsürtemi formal port of entry nung asylum bushirtem meyipa yoktsü melar saka unofficial crossings nungbo mamshir.

Iba yongji official border crossing malidak nungi migrant tem aika Canada-i aitsü meranger.

Migrant tem Canada den arütsüleni aor nem angati bus ticket agütsür, ta New York City ketdangsür temi taoba ita shia liasü.

US-Mexico arütsü nung migrant teblemtsü aliba ajanga US ketdangsür temi iba agreement ya meyanglushinüi liasü.

US-Canada agreement ya tekeraba nungi mapa kuma inyaktsü akok, kechiaser iba atema US Congress temelaba menüngdal.

**ALL INDIA INSTITUTE OF MEDICAL SCIENCES**  
ANSARI NAGAR, NEW DELHI - 110 608  
Admission Notice No.71 /2023

**July-2023 session atema AIIMS, PGIMER, NIMHANS, SCTIMST & JIPMER asoshi DM/M.Ch & MD (Hosp. Administration) Courses nung Admission agitsü atema UNU-SS Entrance Test**

**AIIMS New Delhi aser danga AIIMS, PGIMER, NIMHANS, JIPMER aser SCTIMST trok nung July, 2023 session atema Post-Doctoral (DM/M.Ch.(3 year)/MD (Hospital Administration) Courses nung admission agitsü atema Entrance Examination atema All India Institute of Medical Sciences, New Delhi ajanga online application meshir.**

Online Registration for application			
Courses	Institutions	Opens on	Closes on
DM/M.Ch.(3 year)/ & MD (Hospital Administration)	AIIMS - New Delhi & other Six AIIMS, PGIMER, NIMHANS, JIPMER and SCTIMST	23.03.2023	06.04.2023 at 5:00 PM

**Tongtipang** : Prospectus, osang tejangja atema imlibilema website [www.aimsexams.ac.in](http://www.aimsexams.ac.in) nung reprangang. Applicants ajunga dang mapang shia iba website semdangtsüla, kechiaser iba sülen Corrigendum/Addendum/Updates ajak website nung dang inoktsütsü.

**ASSISTANT CONTROLLER (EXAM)**



Mungyeong, Korea nung March 24, 2023 nung Asian Hockey Federation's (AHF) Annual General Meeting alidang India tsür hockey team nung midfielder Salima Tete-i nem AHF Emerging Player of the Year Award agütsü.

### Lionel Messi-i goal agütsüba 800 jungogo

**Buenos Aires, Metsüremi/ March 24 (Agencies):** World Cup akokba sülen asaya mezüngbuba nung Argentina-i 2-0 agi Panama madak takok anguba asaya nung Lionel Messi-i pa asoshi goal 800 buba agütsüogo.

Cristiano Ronaldo sülenbo aiba alizüing tongteterji arishi küm 35 tain Paris St-Germain forward ya dang alitsü.

Messi indang goal tem züngdangba ya Barcelona nungi season 17 asayadang goal 672 aser PSG atema goal 29 agütsüba densema lir.

Pai international goals 99 agüja lir aser item rongnung goal ana World Cup final nung agütsü.

Buenos Aires nung aliba Monumental de Nunez Stadium nung asayadang Thiaog Almada-i minute 11 buba nung goal ka agütsür minute 89 buba nung Argentina captain-i free-kick metsüdang goal ka yoktet.

Argentina ya Mongulbarnü Curacao den asayadang Messi-i pa asoshi international goal 100

buba agütsütettsü maongka angutsü.

Messi-i football asayaba tsütsü ibai alizüing tasen ka lir, shibai Champions Leagues trophy pezüben, La Liga titles 10 ben, Copa America aser tesüsa December ita World Cup koka lir.

Messi ya mapang ajak nung asayar tajungtiba ka ama züngshir aser pai European football nung best player of the year nem agütsüba Ballon d'Or sempet tenetben ngua lir, anaben agi Ronaldo dang timba.

Tang tashinung Messi-i major competition nung asayar takok monguteti alibaji French Cup dang lir.

Messi-i Barcelona den asayadang trophy 35 ajangeta lir, kong pa arishi küm 13 asüadang aden aser iba club puti otsü nung 'most decorated player' ta züngshir aser Braca indang 'all-time scoring and appearance (778) record' bena lir.

La Liga nung asayartem rongnung pai goal timtiba (474) agütsütetba aser assists timtiba

(192) agütsüba otsü bena lir aser ano Spanish top flight nung season ka nung goal timtiba agütsüba konang pai bena lir, koba 2011-12 mapang asaya 37 nung goal 50 agütsüteta liasü.

La Liga nung asaya ka nung goal asem agütsüteter ronung pai timtiba (36) agüja lir aser season ka nung asaya balala asem nung takok anguba timtiba otsüa Ronaldo tena kasa ti nung lir.

Champions League indang all-time top scorer nung Portugal nungba Ronaldo ya temaba jenjang nung goal 140 agütsür lir aser Messi-i goal 129 agüja lir.

Messi ya Argentina nung asayar rongnung timtiba (172) asayadanger alitsü aser par linük asoshi goal 99 agüja lir. Argentina nung rongnung pa sülen Gabriel Batistuta lir, shibai asaya 78 nung goal 56 agütsütet.

International jenjang nung football asayar teburtem rongnung goal timtiba ya Ronaldo (120) lir aser pa sülen Ali Daei-i 1993 aser 2006 tsüngta goal 109 agüja lir.

### ISSF World Cup 2023: Rudranksh Patil-i Bronze angu

**Bhopal, Metsüremi/March 24 (Agencies):** Madhya Pradesh kübok Bhopal nung ISSF World Cup alidang India nung world champion Rudranksh Patil-i tebur 10m air rifle tetokteiba nung bronze ngua liasü, koba iba asayamung nung pa asoshi bronze tanabuba alitsü.

Tebur 10m air rifle tetokteiba nung China nung Tokyo Olympics nung silver medal angusang Sheng Lihao-i gold ngua liasü aser külem lisopur Huang Yuting, shibai taoba küm Cairo World Championships nung gold medal ana tashi nguteta liasü, lai tetsür tetokteiba nung takok angu.

Iba tetokteiba asemnü atemdang medal tally nung China temaba jenjang lir, shirnoki gold pongu, silver ka aser bronze ana nguteta lir. India ya tanabuba jenjang nung bronze asem, gold ka aser silver



ka nguteta lir.

Rudranksh-i qualification tetenzüklen junga akha aser tatem tashinung pai 631.0 nguteta jenjang pezü buba nung tembang.

25-shot top eight ranking round nung third five-shot series tashi pa teimla samar liasü, saka fourth series nung pai 53.5 nguteta jenjang tajungba akum.

Shot 20 buba tashi China nung asem Sheng, silver angusang Du Linshu aser Yu Haonan nung ya 1-2-3 jenjang

nung liasü.

Rudranksh ya Yu sülen fifth series 0.8 nung liasü aser iba sülen akhaba nung 52.6 nguteta liasü.

Pai ajak senteper points 262.3 ngutet aser gold medal match asayatsü alisang Sheng aser Du nati 264.2 aser 263.3 nguteta liasü.

Tetsür 10m air rifle nung India tsür Ramita ya jenjang ti buba nung liasü, shibai 632.3 nguteta tetokteper 52 rongnung tanabuba jenjang nung tembang.

Temaba jenjang ti nung China tsür ana, America tsür ana, India den Romania, Israel aser Kazakhstan nungi ka-ka lir.

China tsür Huang Yuting ya qualification nung tematiba jenjang liasü, shibai points 632.8 ngutet aser Tokyo Olympics mixed team air rifle nung USA nungi silver medallist Mary Tucker-i jenjang tenetbuba ajangzük.

### MIP, NSCN/GPRN-i.. (Tapak 1 nungi..)

Hokato Vusshe aser Phuyeka Achumi na state nung ozüing amertemi bushir aser Naga civilian aika tepsetba atema tena anema 'look out notice' agütsüogo ta parnokisa ashi.

May 2022 nung designated camp, Khehoi nungi par züngsemtemi Hokato Vusshe meindok saka Naga yimsüsür kayi Nagaland nungi Delhi tashi Hokato Vusshe nem telok balaka tentettsü atema jembia senzür, Ajisiaka New Delhi nungi osang tajung manguba ajanga tasa tasen ka atonga inyak, ta MIP sangdong nung shia lir.

Hokato Vusshe aser pa den külemi tasa atongertemi Khango Konyak, Shellen Konyak aser

Phuyeka Achumi nem süpokrem aika agütsür Ato Kilonser Col. (Retd.) Isak Sumi tepsettsü tasa atong. Hokato Vusshe nem NSCN/GPRN nung Ato Kilonser inyakdak-tsütsü atema iba tasa atong.

Iba jagi January 4, 2023 nü Phuyeka Achumi-i Col. (Retd.) Isak Sumi tepsettsü merang saka Home Kilonser yariba den Tsüngremi pa tasü nungi kümzük. Phuyeka Achumi-i Isak Sumi'er kidang aliba osettsüset ajak agi aser pa kinungtsü o tanurtem kidang nungi meindok. Thilixu village aser Sumi nung teloktemi eviction notice agüjaka pai iba kidang tashiyim agi liyonga aru, ta MIP, NSCN/GPRN sangdong nungsa shia lir.

### Khristantemi longkak... (Tapak 5 nungi..)

Nethanyahu-i iba bill agienba atema tenüngsang agüja Evangelical lenir, Joel C. Rosenberg-i, "Iba ya religious freedom aser meimchir temeden atema takok lir. Ajakji Ato kilonser Netanyahu ket nung liasü, aser pai Israel nung Khristantem aser Messianic Yihuda nung temeden kümzüksü atema telemtetba agiba ya tesüngmangtsüka lir," ta metetdaksü.

Israel nung nütsüing million 9 lir; nütsüing shilem 74 Yihuda nung lir, nütsüing shilem 18 Muslim nung, nütsüing shilem 1.9 Khristantem, shilem 1.6 Druze aser nütsüing shilem 4.5 ji tangartem lir (CIA World

Factbook).

Messianic Yihuda nung 55,000-ibo Yisu Khrista ya shidakba Messiah lir ta amanger.

Rosenberg-i ashiba agi, Israel nungeri Yeshua (Yisu) indang tali metettsü jangrar; ultra-Orthodox-i ibajia anemyonga aikati Yisu indang tali metetner ta metetdaksü.

Paisa, Ibri nung oshi nung Yisu dak amanger Yihuda nung indang video balala online nung million 50 ben dak tema reprangogo, ta ashi.

"Alima nung aser Israel nung Ibri oshi jembir million 50 dak tema mali, anungji nisungtemi video balala repranger," ta Rosenberg-i ashi.

### US-i Syria nung tayimtsü amshia... (Tapak 7 nungi..)

"US sepaitem kumzükä ayutsü tebilemba nung amak. Tensa tamajungba mekumdaksütsü aser asü-amar tajemba alitsü tangatetba nung United States-i mera agi," ta defence department sangdong ka ajanga ashi.

Iba tesem ya Iran-i yariba militia teloktem aser Syrian sepaitemi amokbanga lir aser yangji tawa Israel-i tayimtsü amshia Iranian supply routes nung tenük yoker amak, ta temolung melemtetli lir.

US-i tayimtsü amshia amakba atema Syria mesüra Iran nungi osang kecha sangdonga mali.

Yirur aliba US sepaia ana Syria nung parnok amenoka aliba tesem nung anepalu aser ano US sepaia asem aser US contractor ka Iraq nung aliba coalition medical facility bushia anir ao, ta

defence department ajanga ashi.

ISIL anema raraba aser US sepaitemi lendong timtem ajuruba asadangtsü asoshi US general Mark Milley-i northeast Syria semdang hopta ishika lir iba lendong ya ataloker.

Syria nung US sepaia anema amakba lendong teti atalokaka Brehostibarnü drone amshia amakdang asüba aser yiruba amabo majangshi.

2021 küm tenzükler Iran nungeri yariba telok temi US sepaia dak 78 ben shi makogo, ta Middle East nung US sepaia ketdangtsür General Erik Kurilla-i shia lir.

Brehostibarnep US House of Representatives Armed Services Committee nem kuli agütsüsang Kurilla-i Iran indang drones tem tekum dangtsü shia liasü.

### N.Korea-i underwater nuclear... (Tapak 7 nungi..)

North Korean news agency ajangasa US-South Korean exercises aitsü aser iba inyakyim ya ajanga Korean tzümeketli nung mitkar aser yimten tsütsü tensa tamajungba kumdaksür ta aitsü, ta Yonhap ajangasa ashi.

Washington aser Seoul lungjemer military exercise agiba ya tarutsü nung par linük amaktsü asoshi renemshiba maparen lir aser item amala drills mechi paria nok-nü tendanger, ta

North Korea-i mapang talangka nungi jembia arur.

North Korea-i Bodhbarnüa cruise missiles pezü khadok ta shiogo. Missile tem nungya nuclear warhead ama inoker tendanga meta kilometre 1,500 nungi 1,800 tashi ao, ta KCNA news agency ajanga Hokulbarnü ashi.

South Korea mitkaria North Korea-i cruise missile pezü khadokba osang Brehostibarnü sangdonga liasü.

## BILEMDANGANG

"Shisa takari shinga danga tamachi nisung ta majar."